

Date – 03/04/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Mizoram Larsap General (Rtd) Vijay Kumar Singh leh Chief Minister Pu Lalduhoma chuan Good Friday hmangtu kohhran zawng zawng te duhsakna a hlan.
2. Mizoram Chief Secretary, Pu Khilli Ram Meena chuan Kolasib District a 4 lane kawng laih mek hnathawktu NHIDCL leh Contractor te chu a chak thei ang bera an hna la peihfel loh te thawk turin a hriattir.
3. Mizoram DGP Pu Sharad Agarwal chuan nimin khan Kolasib District chhunga Police Station leh Border Outpost te a tlawh.
4. Lok Sabha-ah Central Armed Police Forces (General Administration) Bill, 2026 sawi ho tan a ni a, Rajya Sabha chuan he Bill hi a pass tawh a ni.



GOOD FRIDAY

Mizoram Larsap General (Rtd) Vijay Kumar Singh leh Chief Minister Pu Lalduhoma te chuan Good Friday hmangtu kohhran zawng zawng te duhsakna a hlan.

Vawiin Good Friday pual thuchah hi nizan khan Chief Minister Pu Lalduhoma hian social media kaltlangin a ti chhuak a. Pu Lalduhoma chuan Lalpa Isua Krista thih champha (Good Friday) hmangtu kohhran zawng zawng te, hlim leh lawm taka hun in hman theih nan duhsakna kan hlan a che u, a ti.

Nizan khan Mizorama kohhran lian Presbyterian kohhran chuan Zan ven Inkhawm an hmang a, kohhran hrang hrang te pawhin he hun hi urhsun taka hmangin Lalpa Zanriah Sacrament an theh a, kohhran Zaipawl ten hla an rem bawk. Kohhran thenkhat chuan Kesil Rawngbawlina neiin, inkhawm bana lengkhawm an awm bawk a ni.

Vawiin nileng hian Good Friday hman chhunzawm a ni dawn a. Chawhma leh chawhnu bakah zanah urhsun takin Pathian biak inkhawm a awm ang.



CS

Mizoram Chief Secretary, Pu Khilli Ram Meena chuan Kolasib District a 4 lane kawng laih mek hnathawktu NHIDCL leh Contractor te chu a chak thei ang bera an hna la peihfel loh te thawk turin a hriattir.

Pu Khilli Ram Meena hian nimin khan Kawngpui siam lai hi a hmunah a tlawh a, chumi hnuah NHIDCL aiawhte leh Department hrang hrang hotute nen inkawm zuiin Chief Secretary chuan National Highway 306&06 thawmthat hna hi hun rei tak chhung thawh a nih tawh hnuah pawh, chhuanlam chi hrang hrang vanga peihfel a la ni thei lo chu pawh a tih thu a sawi a. Nikum lamah pawh he hna hi chak taka kalpui a nih theih nan amah ngei Kolasib-ah kalin hma a lo la tawh a, hemi chungchanga NHIDCL aiawhten an tiam anga hna an la hlen chhuak lo chu a lungawithlak loh takzet a ni, a ti.

Hna an zawh theih loh chhan atana an harsatna tarlante chu chhuanlam tlingah a ngai lo tih sawiin, 'Chhuanlam siam tum tan chuan chhuanlam tur a awm reng thin a, amaherawhchu, a taka hnathawh kan hmu duh a ni,' a ti. NHIDCL aiawhte chu an contractor rawihte khauh taka thunun tur leh, tun aia chak lehzuala hma la turin a chah a; he kawng siamthat hna kal mek chu April thla chhung ngeia peih fel vek turin a hriattir nghal bawh a ni.

Chief secretary hian Counter Insurgency and Jungle Warfare School (CIJWS) Vairengte pawh tlawhin hetah hian ram neitute nen ram inhlam chungchanga chin fel leh bawhzui ngai la awm te CIJW hotute nen an sawiho a. CIJW atang hian Kolasib lam pan chho in 4 lane kawng laih mek te leh kawngpui hman mek thawmthat hna kal mek te hi a hmunah a enfiah nghal a ni.

<><><>DGP

Mizoram DGP Pu Sharad Agarwal chuan nimin khan Kolasib District chhunga Police Station leh Border Outpost te a tlawh a.

Vairengte Police Station leh Vairengte Police Check Gate ah Police Station Inspection a neih bakah thawktu te a kawm a, Lailapur CIJWS hmunah Drone Demonstration program a hman pui leh bawh a ni.

DGP hi Kolasib SP Pu Lalrinpuia Varte leh 1st IR Battalion Commandant Mualvum Pu MS Dawngkima ten an tawiawm a ni.

<><><>

COAL

Maheswary Mining Pvt.Ltd te chuan Lunglei bul, Rotlang West leh Hauruang Local Council huam chhungah Lungalhthei (Coal) a awm leh awm loh zawn hna an thawk zo tawh.

Kolkata-a an Laboratory-ah Exam turin sample thawn a ni tawh a. Mining Engineer Pu Lalnunsiana Fanai chuan, hmun 12-ah lei hi verh (bore hole) a ni tih Akasvani palai hrilhin heng zing a hmun 3 (bore hole)-ah chuan Coal trace hmuh a ni a ti a, nikum November thla vel khan Kolkata-a an hmunpuiah Maheswar Mining

Pvt Ltd te hian an thawn a, result hi kan ngahk mek a ni, a ti. Lungalhthei (Coal) ber ai chuan Rare Earth Elements hi a quantity tam lutuk lo chu an beisei zawk mah a ti a. Lei verh hi standard awm sa Km 40 bial chhungah tih a nih angin bore hole 12 te hi Rotlang West atanga Hauruang Local Council area thleng verh a ni tih sawiin heng lei verhna hmun hi mimal ram chhung deuh vek a ni mai thei a ti bawk.

(Geology & Mining Deptt hian Lunglei Chanmary-ah Office mumal tak neiin staff 4 an awm a, balu, rora, cubic lung leh lung atanga thil siam chhuah (bye product) lam atangin Sorkar-ah chhiah (Tax) an la thin a, kum 2025-26 chhung khan Mizoram Sorkar-ah chhiah Rs Nuai 10 vel an chhunglut a ni.

Tlabung lamah Check Gate siam chu an hmachhawp a nih thu leh hei hi an ti hlawhtling thei a nih chuan Revenue pawh an hmuh belh a rinawm a ti. Hetihruah hian Lunglei Dist chhung hmun thenkhat, lui kuang hnaivai a boruak alh tu ten emaw an hmuh thin chu Marsh Gas (hnawl leh chirhdiak insiam vanga alh ve) a ni deuh ber a ti.)



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



RD MINISTER

Rural Development Minister Prof. Lalnilawma chuan Community Nursery chu ram tana rotling a nih tur thu a sawi.

Nimin khan Minister Prof Lalnilawma hian Maite khua a Thing tiak enkawlna Nursery hi a tlawh a, minister chuan Nursery chu ram tana rotling leh nakin thlenga ram leilung fate tana chhen fakawm thil a nih thu sawiin hma latu RD department te thawhrimna leh inpekna chu lawmawm a tih thu a sawi a, kum tin ram vah chereuva, a dah belh lam a tlem si chuan kum rei lo teah mihringten kan tuar mai dawn a ni, a ti a. Mipuite chu theih ang tawka RD Department hmalakna te chu thlawp turin a chah bawk.

He project hi RD dept hnuaiyah kum thum (3) chhung atan ruahmanna siam niin a tum ber chu chereu tawh te phun khah lehna ni a, MGNREGA hnuaiyah mipuiten ramngaw siam a nih leh theih nana hmalakna pawimawh leh lian tak a ni bawk. Project cost hi cheng nuai 80 niin kumin (2026) hi a kum 2-na a ni a, nursery-ah hian thing (variety) chi hrang hrang 28 kui tiah a enkawl mek niin thing tiak hi 50000 (singnga) vel neih mek a ni.



CHAMPHAI DC

Kum 2027 Chhiarpui kalpui mek chungchangah Champhai District Bawrsap Pu Mohammad Aaquib chuan nimin khan a Pisa-ah chanchinbumite kawmin chhiarpui kalpui dan tur chungchang a hrilhfiah.

Champhai District Bawrsap Pu Mohammad Aaquib chuan Kum 2027 Chhiarpui kalpui dan tur leh kalphung tur hrang hrang hrilhfiahin, tunlai thiamna, digital veka kalpui tur a nih avangin Enumerator te'n in tin tlawhchhuakin Mobile phone hmangin chhiarpui hi kalpui a nih tur thu a tarlang a, Champhai District ah Enumerator leh Supervisor 207 an awm a, anmahni bialtu Nodal Officer te kaihhruainain training pek an nih tawh thu leh tul anga training hi pek zel tur an nih thu pawh a tarlang bawk.

Kum 2027 chhiarpui hi April ni 1, 2026 atangin kalpui tan a ni a, tun tum chhiarpui hi India rama chhiarpui vawi 16 neihna tur a ni a. Kum 10 dana chhiarpui neih a nih lain kum 2011 kha chhiarpui neih hnuhung ber a ni a, chhiarpui 2027 hi chhiarpui vawi 16-na a nih rualin India ramin zalenna a hmuh hnua chhiarpui neih tum 8-na tur a ni, a ti bawk.

<><><>

LOK SABHA TAKES UP CAPF BILL

Lok Sabha-ah Central Armed Police Forces (General Administration) Bill, 2026 sawiho tan a ni a, Rajya Sabha chuan he Bill hi a pass tawh a ni.

Bill hi House pawmpui turin Union Minister of State for Home Affairs, Nityanand Rai-a'n a pu lut a, Central Armed Police Forces-a Group A General Duty Officer leh officer dang hna lak dan leh an service kalphung siam thatna tur bill a ni a, Inspector General rank post zaa 50 leh Addl Director General post, a lo berah zaa 67 bakah Special Director General leh Director General rank post zawng zawng, deputation-a Indian Police Service (IPS) officer-te luah tirna tur a tel bawk a ni.

<><><>